

中國方志叢書·華中地方·第九三三號

據

清·陳驤等修，張瓊英等纂
清道光四年刊本

影印

江西省

鄱陽縣志

(七)

成文出版社有限公司印行

晉文

招學徒文

鄒陽
內史
虞溥
昌邑人

學所以定情理性而積眾善者也情定於內而行成于外
善積于心而名顯于教故中人之性隨教而移善積則習
與性成唐虞之時比屋可封及其廢也而云可誅豈非化
以成俗教移人心者哉自漢氏失馭天下分崩江表寇隔
人替王教庠序之訓廢而莫修今四海一統萬里同軌熙
熙兆庶咸休息乎太和之中宜崇尙道素廣開學業以資
協時雍光揚盛化乃具爲條制于是至者七百餘人溥乃
作語獎訓曰文學諸生皆冠帶之流年盛志美始涉學庭

講修典訓此大成之業立德之基也夫聖人之道淡而寡
味故始學者不好也及其朞月所觀彌博所習彌多日聞
所不聞日見所不見然後心開意朗敬業樂羣忽然不覺
大化之陶已至道之入神也故學之染人甚于丹青丹青
吾見其久而渝矣未見久學而渝也夫工人之染先修其
質後事其色質修色積而染工畢矣學亦有質孝弟忠信
是也君子內正其心外修其行行有餘力則以學文文質
彬彬然後爲德夫學者不忠才不及而患志不立故曰希
驥之馬亦驥之乘希顏之徒亦顏之倫又曰剡而舍之朽
木不如剡而不舍金石可虧斯亦其效乎今諸生口誦

人之典體閑庠序之訓比及三年可以小成而令名宣流
雅譽維新朋友欽而樂之朝士敬而嘆之于是州府交命
擇官而仕不亦美乎若乃含章攄藻揮翰流離稱述世務
探賾究奇使楊班韜筆仲舒結舌亦惟才所居固無常人
也然積一勺而成江河累微塵以崇峻極匪志匪勤理無
由濟也諸生若絕人間之務專心親學累一以貫之積漸
以進之則亦或遲或速或先或後耳何滯而不通何遠而
不至耶

宋

文

饒州謁顏范祠文

王十朋

二公名節百世所師俱臨是邦遺愛猶在死者可作非公孰歸某濫竊郡符獲瞻祠像太山北斗心實慕之視事之初敢不躬告

顏范新祠成奉安祝文

王十朋

番陽九賢咸有善政忠肅之忠文正之正九賢之中於斯爲盛祠宇一新丹青輝映凜然如生尙餘剛勁以激忠義以警邪佞福我邦人不禱而應不水不旱無兵無病血食萬年孰敢不敬祀事之初神乎其聽

祭彭江州文

卽汝礪時
知江州

會 輦

嗚呼器資忽不見其安之乎孰謂天生斯人而止於斯乎
人固忌子之獨立天亦責子之不詭隨乎不然何以壽不
躋於六十位不過於四品卒泯默而無施乎嗚呼器資凡
世可貴學問文章言語政事有一於茲足高士類而况居
今行古蹈義依仁眾人所趨而視若無有舉世所背而任
肩以身陷穽當前而不避會何得喪之足云此固聖賢之
自任豈止度越於時人至若孝友著於閭門信義行於鄉
黨處榮悴而無虧臨死生而不亂可謂內外全德始終一
貫實積流之砥柱宜大厦之榱幹奈何道未行於當世福

未及於生靈忽漂流於下國遂天闕於修齡去此昭昭卽
彼冥冥有志不就銜恨寡屈惟所立之卓偉宜萬世如日
星彼一時之苟得譬熠熠之與長庚嗚呼器資未俗陵遲
朋友道忽許與之分切嗟之益眾皆訑訑子獨汲汲我生
昏愚與世殊適惟子好我論心莫逆我先我後子爲羽翼
我有過咎子爲藥石子今云亡我善誰責豈無他人莫如
子直嗚呼器資今昔太學相從之初綢繆繆繆二十餘年
中間省闈並無贊書出入風議惟予子俱子如飛黃豈愛
馬拘有言不用去不須與我亦遭讒自請州符跡有乖隔
心焉弗殊去歲京城子留我北中情莫宣相視默默我行

未幾子亦南遷孰云契闊曾不經年尺書未達已隔終天
寢門一慟有淚如泉嗚呼器資子計之來我適罪逐相念
平生了然在目匍匐欲往身有羈束千里寓詞以代號哭
尙饗

(元)

祭徐松巢

吳存邑人

昔柳子厚之祭呂化光歐陽公之祭尹師魯皆其平生莫
逆之交而言辭吐出其肺腑蓋學莫樂於同好之相求交
莫深於知己之相與故鍾子死而伯牙絕其高山流水之
絃郢人亡而匠石輟其聽風斲堊之斧嗚呼巢君人中之

麟文中之虎金石擊撞雲霧吞吐萬牛不能回其翰墨之
鋒三峽不足供其清談之塵其蕭散也以風月爲朋徒其
曠達也以天地爲逆旅發爲詩章用意深苦故山村仇公
愛君之氣清養吾李公賞君之調古他時景文湯訪君於
山中如太邱之過朗陵後來南翁周詫君於中朝如正平
之稱文舉君有美玉匱而弗賈寧疏食瓢飲浩然於林泉
不以角巾羽扇點污於塵土雖一世之知音者稀而君亦
眼空四海羞碌碌而不數雖君之抱負不得展其輪囷而
君之文章終不與草木而俱腐嗟我與君弱冠相伍七年
青燈飽聽風雨聲之相應如伯埴而仲篴氣之相合如陽

律而陰呂雖人事好乖中年多離闊之夢而交情不渝山
川無遠近之阻初余與君與時齟齬惟芳洲翁以二妙許
或者議其卽且之甘帶鴟鴞之嗜鼠然使其身亨而志污
亦勝士之所不取前二十年詩筒縷縷二翁招余以早歸
結一菴而遊處余坐于貧竟負斯語奈何占人千里雞黍
嗚呼君與芳洲逍遙帝所我獨世間能不淒楚嗟故知之
已空諒久生而何補倘俗緣之未盡尙來世之同侶君能
飲乎我酒維醺明日西山白雲一塢

明

告先聖文

劉炳

維大明洪武歲次甲子五月戊戌朔越五日壬寅後學等
敢昭告于

先聖大成至聖文宣王之靈曰猗歟聖道師表萬代泰山黃
河之流峙景星慶雲之昭麗嘉禾芝草之正祥麟鳳龜龍
之奇異仰之瞻之是則是武高莫可企深莫可際嗟嗟予
衿總角趨庭以訓以謨欽誦遺經早失所怙中罹甲兵驚
鈍偷墮內省如焚驅馳歲故年往志存髮齒日悴窮廬悲
呻幸守邱墓桑梓是鄰追憶舊習講學有賓涓茲令節旨

酒繁蘋恭率諸生明薦載陳庶假靈威啟我後人洋洋在
上虔申告文

祭忠烈胡公文 代郡尊楊際會

史桂芳

初九潛龍芝嶠靈鍾方九有之戰血元黃獨不擾幽人之
耿衷攬轡澄清寄意咏松一言動工聲蜚九重補闕簪螭
頭之鐵筆封章擊賣國之景隆東昌捷奏棘寺階崇天光
分曜陽九奇窮甘菹醢以如飴遂湛族以相從仁皇登極

首念諸忠郡奴生還傳福釋戎安木主于鄉祠賴端峯之
文宗史局大吏隱掩非公二百年來竟缺昭融幸遭逢大
聖人嗣無疆大厯服矢諸二三元輔曰所謂詔赦者循故
常蠲租稅釋繫囚已乎褒表忠魂激厲臣節肆余冲人之
首事也乃渙大號乃布寰中所在專祠典祀攸隆墳墓苗
裔恤錄恩豐維時按臺侯公復吾前守陳公省齋欽承恩
詔登進士民颺言曰大聖人不繼祖宗之迹而不從祖宗
之大志不述祖宗之事而光大祖宗之明聰宏武周之達
孝樹孤竹之高風則有瞻山屠令被召臺郎首崇風化抗
疏言昌天顏嘉賞部檄榜章懸之邑門梟目正陽旋風捲檄

扶搖翔萬目驚仰嗟嘆徬徨自午迄申還于邑堂一紙
不裂一字不傷今日胡公真飛騰靈物耶二百年英爽遏
之愈揚抑之愈光程令蘿陽躬遭奇遘躬檢戎牘而深慨
慕乎前賢得惠州張先生一百一十四人開釋厥愆士民
咸爲英風紀異著有詩篇小子際會甫一人羈程令慷慨
爲忠建言令未言畢余心奮然對揚天子之休命孰大乎
此焉宏敷七饒之風教孰切乎此焉復痛我公一腔血洒
荒原一寸丹照九天無血允一綫承錄蔭睿恩無荒墳一
坵被封樹珉鐫獨建專祠合祀羣賢食念在食眠念在眠
頃得茲基爲饒城最高阜雖居城內實遠塵喧但其地世

爲民居一夕其家夢緋袍巨卿卜築于此且聞羗邑咨諏
勤拳遂徙其居願爲公捐雖忠烈之顯靈赫濯亦斯民之
趨義聯翩余卽折柬約鄉大夫達觀其所載登其堂宏厰
高堅四墉崇聳祀公儼然後樓卽堪寢室祀公夫人及公
之子與公之姻之友英爽聚焉祠之後爲番君廟公之會所
豪傑畢集精魂合焉祠之左爲碩輔坊胡家橋公之祖考
咸萃于斯則又公所承祀者焉矧茲長至令節龍德方亨
君子道長此日迎神于公正宜此地嘗蒸忠靈必棲月夕
風辰公與同志諸賢握手論心嗚呼公爲君死哀此羣賢
亦爲公亡求仁得仁顛沛何傷際會虔誠拜舞門墻敢不

夙夜惟寅庶可覲乎公之耿光濟濟後生敢不以道義相
砥磨期步趨乎餘芳公之英爽臨之在上同志諸賢質之
在旁元酒一滴直通九原嗚呼胡公尙其願瞻尙饗

祭告溧陽祖侯文

史桂芳

正氣在乾坤間終古不朽人得天地之正氣以生亦不朽
祖侯在漢馮異偏裨耳廟祀迄今不衰將與孔顏孟廟相
輝映豈偶然哉繇祖稟天地正氣而無一毫邪偽雜之也
故其聖德宏才或有所避而不盡施又或歛其神功一時
不及知而史冊不傳與不然何厯唐及宋千餘年猶能坐
湧三泉爲霖雨茲非終古不朽之氣之所爲與爲侯子孫